

MALAYSIA
DEWAN NEGARA
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI RABU, 11 JULAI 2012, PUKUL 10.00 PAGI

Bil. 14

PERTANYAAN-PERTANYAAN BAGI JAWAB LISAN

1. PN-1252-L15117
Dato' Abdul Rahim bin Abdul Rahman minta **MENTERI PERUMAHAN DAN KERAJAAN TEMPATAN** menyatakan tindakan yang diambil dalam menangani masalah kewujudan peniaga-peniaga warga asing yang berniaga di premis-premis perniagaan dan pasar-pasar borong tanpa lesen dan menimbulkan masalah kepada peniaga-peniaga tempatan.
2. PN-1252-L14924
Tuan Baharudin bin Abu Bakar minta **MENTERI WILAYAH PERSEKUTUAN DAN KESEJAHTERAAN BANDAR** menyatakan apakah tindakan pihak Dewan Bandaraya Kuala Lumpur (DBKL) terhadap bangunan-bangunan lama yang terbiar dan lusuh di sekitar Kuala Lumpur dan adakah DBKL tidak bercadang untuk menjadikannya sebagai satu tarikan pelancong seperti mana yang dilakukan oleh Kerajaan Negeri Melaka yang berjaya mengubah bangunan-bangunan terbiar sebagai satu tarikan sejarah.
3. PN-1252-L15107
Dato' Muhammad Olian b Abdullah minta **PERDANA MENTERI** menyatakan cadangan pihak Kerajaan menujuhkan Akademik Undang-undang.
4. PN-1252-L14802
Datuk Chin Su Phin minta **MENTERI DALAM NEGERI** menyatakan berapakah nilai saman yang tertunggak bagi warganegara asing sehingga kini dan apakah rasionalnya pihak Kementerian dalam melantik agen kutipan saman trafik dan adakah rakyat Malaysia akan terbeban dengan perkara ini.
5. PN-1252-L14843
Tuan Haji Muhamad Yusof bin Husin minta **PERDANA MENTERI** menyatakan adakah Kerajaan bercadang menerima pemerhati luar negara semasa Pilihan Raya Umum ke-13 nanti. Jika ya, nyatakan pasukan dari negara mana dan jika tidak, berikan sebab-sebabnya.

6. PN-1252-L15339
Puan Roslin binti Haji Abdul Rahman minta **MENTERI LUAR NEGERI** menyatakan setelah hampir satu tahun perpecahan Sudan kepada dua, adakah pihak Kerajaan Malaysia telah mula menjalankan aktiviti diplomatik dengan Republik Sudan Selatan tersebut.
7. PN-1252-L15065
Puan Hajah Mariany binti Mohammad Yit minta **MENTERI SUMBER MANUSIA** menyatakan mekanisme pelaksanaan Dasar Pekerja Domestik Tempatan untuk mengisi keperluan dan permintaan majikan bagi pembantu rumah tempatan kerana masalah-masalah yang wujud untuk mendapatkan pembantu rumah daripada negara sumber seperti Indonesia, Filipina, Kemboja dan lain-lain negara.
8. PN-1252-L15242
Datuk Hj Saat bin Hj Abu minta **MENTERI KERJA RAYA** menyatakan supaya memperbanyakkan kerja di bidang-bidang pembinaan kelas F hingga kelas D kerana di akhir-akhir ini kegiatan berkaitan kerja-kerja pembinaan kelas F hingga kelas D amat berkurangan di seluruh negara, ini boleh menjelaskan sumber pendapatan kepada mereka. Apakah langkah-langkah yang perlu diambil untuk mengatasi masalah ini.
9. PN-1252-L14930
Dato' Lim Nget Yoon minta **MENTERI PENGANGKUTAN** menyatakan kebanyakan pekebun kecil serta peladang terpaksa menggunakan kenderaan-kenderaan pacuan empat roda yang berkuasa tinggi untuk membawa keluar hasil mereka. Bolehkah Kementerian mengurangkan bayaran cukai jalan kenderaan mereka memandangkan mereka ini lebih menggunakan jalan-jalan dalam kebun daripada jalan raya.
10. PN-1252-L15290
Datuk Raja Ropiaah binti Raja Abdullah minta **MENTERI KESIHATAN** menyatakan adakah tahap kesihatan negara memuaskan dan apakah langkah-langkah yang diambil untuk menentukan rakyat Malaysia akan menjadi lebih sihat dan lebih produktif seperti kurang mengambil cuti sakit, mengurangkan perbelanjaan ubat dan rawatan. Kementerian patut mengkaji akta-akta seperti untuk penjualan makanan segar masak tidak tercemar dan suplemen makanan tidak beracun.
11. PN-1252-L14878
Puan Hajah Noriah binti Mahat minta **MENTERI KEWANGAN** menyatakan apakah langkah-langkah yang diambil oleh Kerajaan bagi mengurangkan defisit fiskal serta mengawal jumlah hutang kepada paras terurus.
12. PN-1252-L14989
Dr. S. Ramakrishnan minta **MENTERI PENGANGKUTAN** menyatakan siapakah atau golongan manakah yang layak memiliki nombor plat pilihan (1 hingga 10) secara percuma dan apakah syarat-syarat yang melayakkan mereka memiliki nombor plat berkenaan.

13. PN-1252-L15185
Puan Chew Lee Giok minta **MENTERI PENGAJIAN TINGGI** menyatakan jumlah PTPTN yang telah dikeluarkan sehingga tahun ini serta jumlah yang telah dibayar dan belum dibayar balik.
14. PN-1252-L14907
Puan Norliza binti Abdul Rahim minta **MENTERI SUMBER MANUSIA** menyatakan apakah impak sebenar kepada ekonomi negara dengan polisi gaji minimum RM900.
15. PN-1252-L15170
Dato' Boon Som a/l Inong minta **MENTERI PENGANGKUTAN** menyatakan pertandingan bagi menghasilkan alat, kaedah atau pendekatan yang bersifat inovatif selari dengan The Fun Theory bahawa sesuatu yang ringkas (*simple*) dan menyeronokkan adalah cara paling mudah untuk mengubah sikap dan tabiat buruk orang ramai seperti yang dilakukan di Stockholm, Sweden pada tahun 2010, di mana satu percubaan menggalakkan orang ramai memandu mengikut had laju berjaya dilakukan dengan memberi cabutan loteri kepada pemandu kenderaan yang dikesan memandu mengikut had laju oleh kamera. Kadar kelajuan berjaya dikurangkan sebanyak 22 peratus daripada 32 kilometer sejam sebelum percubaan kepada 25 kilometer sejam dalam tempoh percubaan.
16. PN-1252-L14870
Tuan Chiew Lian Keng minta **MENTERI WILAYAH PERSEKUTUAN DAN KESEJAHTERAAN BANDAR** menyatakan mengapa tempat-tempat hiburan yang memainkan muzik berbunyi kuat dibenar menjalankan operasi perniagaan berdekatan dengan kawasan perumahan seperti kawasan perumahan Taman Tun Dr. Ismail, Desa Hartamas, Mont Kiara dan lain-lain.
17. PN-1252-L14772
Tuan Haji Ahamat @ Ahamad bin Yusop minta **MENTERI PENGAJIAN TINGGI** menyatakan:-
 - (a) apakah kriteria yang dipertimbangkan dalam pemberian status Universiti Penyelidikan termasuk autonomi pengambilan pelajar kepada universiti tempatan; dan
 - (b) adakah Kementerian mempertimbangkan pemberian status Universiti Penyelidikan kepada Universiti Teknologi MARA (UiTM).
18. PN-1252-L15051
Tuan Mohd. Khalid bin Ahmad minta **MENTERI SUMBER ASLI DAN ALAM SEKITAR** menyatakan jumlah dan lokasi pembinaan pelan induk tebatan banjir yang telah disiapkan di dalam Rancangan Malaysia Ke-9 dan Ke-10 dan bilakah Kementerian akan melaksanakan kerja-kerja kejuruteraan terhadap pelan-pelan ini.

19. PN-1252-L15259
Datuk Paul Kong Sing Chu minta **MENTERI PELANCONGAN** menyatakan butiran berkenaan kejayaan program Malaysia Rumah Keduaku, bilangan permohonan yang diterima, diluluskan dan ditolak. Nyatakan juga butiran negara asal pemohon.
20. PN-1252-L15014
Dato' Haji Abdul Rahman bin Bakar minta **MENTERI SUMBER MANUSIA** menyatakan apakah pendirian Kementerian terhadap amalan *union busting* yang diamalkan oleh majikan dengan penubuhan kesatuan sekerja dan sikap diskriminasi terhadap kesatuan sekerja termasuk mereka terutamanya di sektor elektronik.
21. PN-1252-L14831
Tuan Haji Muhamad Yusof bin Husin minta **MENTERI PELAJARAN** menyatakan sejauh manakah perkembangan dan hasil dialog dengan semua pihak bagi mengkaji semula sistem pendidikan negara dan adakah Kementerian bercadang untuk merombak semula sistem yang ada sekarang.
22. PN-1252-L15153
Dato' Boon Som a/l Inong minta **PERDANA MENTERI** menyatakan mengenai bilangan rakyat Malaysia yang mengamalkan poligami mengikut pecahan bangsa, agama serta kerjaya, termasuk ahli politik. Apakah punca yang mendorong mereka berbuat demikian.
23. PN-1252-L14837
Tuan Haji Muhamad Yusof bin Husin minta **MENTERI PENGANGKUTAN** menyatakan bilakah Kementerian akan melaksanakan Sistem Pengawalaan Automatik (Automated Enforcement System - AES) untuk mengesan pemandu yang melanggar atau melakukan kesalahan jalan raya dan adakah dengan pelaksanaan sistem ini akan dapat mendisiplinkan pemandu.
24. PN-1252-L15352
Tuan Saiful Izham bin Ramli minta **PERDANA MENTERI** menyatakan tentang jumlah keseluruhan keluasan tanah milik FELDA yang sudah digadaikan kepada Felda Global Ventures Holdings bagi mencapai tujuan penyenaraian di Bursa Malaysia, termasuk berapakah jumlah keluasan tanah berstatus milikan Rizab Melayu yang terlibat dalam penggadaian tersebut.
25. PN-1252-L15112
Dato' Muhammad Olian b Abdullah minta **MENTERI SUMBER MANUSIA** menyatakan apakah kedudukan sebenar jumlah siswazah yang menganggur sehingga kini dan apakah perancangan Kementerian dalam memastikan tenaga siswazah-siswazah ini tidak disia-siakan.
26. PN-1252-L15168
Puan S. Bagiam a/p Ayem Perumal minta **PERDANA MENTERI** menyatakan sejauh manakah pemantauan terhadap pemandu teksi khasnya setelah penubuhan SPAD dan berapakah jumlah kesalahan yang telah didakwa sehingga kini dan berikan pecahan ini mengikut kaum dan 5 jenis kesalahan yang tertinggi.

27. PN-1252-L15253
Datuk Paul Kong Sing Chu minta **MENTERI PENGANGKUTAN** menyatakan pada bulan September 2009, Kabinet telah mengarahkan Ketua Setiausaha Negara untuk membentuk satu Pasukan Petugas Khas untuk menyelia isu-isu PKFZ dan kemudiannya Ketua Setiausaha Negara telah mengumumkan bahawa laporan akhir akan diterbitkan pada April 2010. Apakah yang telah berlaku kepada laporan Pasukan Petugas Khas tersebut.
28. PN-1252-L14959
Tuan Khoo Soo Seang minta **MENTERI PELAJARAN** menyatakan sama ada Kementerian bercadang untuk memasukkan subsidi bil-bil utiliti sebagai sebahagian peruntukan per kapita "Lain-Lain Perbelanjaan Berulang Tahun/Lain-Lain Perbelanjaan Khas LPBT/LPK" untuk semua jenis dan aliran sekolah rendah dan menengah. Sekiranya tidak, apakah sebabnya.
29. PN-1252-L14901
Tuan Syed Shahir bin Syed Mohamud minta **MENTERI SUMBER MANUSIA** menyatakan apakah status Mahkamah Rayuan Perusahaan (*Industrial Appellate Court*) yang ditubuhkan pada awal tahun 2000.
30. PN-1252-L14790
Datuk Chin Su Phin minta **MENTERI KEWANGAN** menyatakan apakah tindakan drastik yang bakal diambil oleh Kerajaan dalam menyelamatkan MAS yang terus menerus mencatatkan kerugian.
31. PN-1252-L14814
Dato' Syed Ibrahim bin Kader minta **MENTERI PEMBANGUNAN WANITA, KELUARGA DAN MASYARAKAT** menyatakan bilangan rumah kebajikan yang ditadbir urus oleh Kerajaan dan pihak swasta. Bagaimana Kementerian memantau rumah kebajikan swasta yang ada segelintir lebih bersifat komersial agar tidak berlaku penyelewengan dan penyalahgunaan. Apakah tindakan yang diambil oleh Kementerian terhadap rumah kebajikan yang tidak berdaftar dan bilangan yang diambil tindakan sejak tahun 2008 hingga kini.
32. PN-1252-L14762
Tuan Haji Abdul Shukor bin Mohd Sultan minta **MENTERI KEWANGAN** menyatakan jumlah kutipan cukai daripada individu, jumlah kutipan cukai daripada syarikat-syarikat dan jumlah kutipan cukai daripada GLCs.
33. PN-1252-L15212
Dato' Dr. Firdaus bin Haji Abdullah minta **MENTERI WILAYAH PERSEKUTUAN DAN KESEJAHTERAAN BANDAR** menyatakan langkah-langkah susulan terkini setelah Akta Perbadanan Pembangunan Kampung Bharu diluluskan dalam sidang Parlimen (Dewan Rakyat dan Dewan Negara) pada penghujung tahun lalu.
34. PN-1252-L15228
Dato' Mohammed Najeeb bin Abdullah minta **MENTERI PERTAHANAN** menyatakan bilangan remaja yang telah menjalani latihan PLKN setakat ini dan kos pengendaliannya. Apakah Kerajaan telah berjaya meningkatkan jati diri dan kesahsian mereka.

35. PN-1252-L15363
Tuan Pau Chiong Ung minta **MENTERI DALAM NEGERI** menyatakan adakah pihak Kementerian akan mempertimbangkan untuk melonggarkan syarat dengan membenarkan syarikat-syarikat mengupah pekerja asing sebagai pemandu kenderaan berat memandangkan semakin susah mengupah pemandu kenderaan berat tempatan yang mahir dan berkualiti.
36. PN-1252-L15138
Dr. Syed Husin Ali minta **MENTERI PELAJARAN** menyatakan secara jelas perkembangan dari segi kuantiti dan kualiti pelajar yang telah belajar di bawah PPSMI sejak ia mula diperkenalkan pada tahun 2003.
37. PN-1252-L15227
Dato' Mohammed Najeeb bin Abdullah minta **MENTERI KEWANGAN** menyatakan bilangan mereka yang telah didakwa di bawah Akta BAFIA 1989, sejak mula diperkenalkan, berhubung salah laku di bawah perkara 87(1)(a) yang melindungi kerahsiaan akaun-akaun pelanggan bank berlesen. Adakah Kementerian bercadang untuk menambah baik akta ini agar kepentingan pelanggan sentiasa dilindungi.
38. PN-1252-L14953
Tuan Khoo Soo Seang minta **MENTERI PENERANGAN, KOMUNIKASI DAN KEBUDAYAAN** menyatakan secara ringkas kedudukan terkini pengurusan dana dan juga projek-projek terkini daripada program pemberian perkhidmatan sejahtera atau lebih dikenali sebagai USP. Adakah program ini, yang telah dimulakan lebih daripada 10 tahun, masih berkesan dan dapat mencapai matlamat yang efektif. Sehingga hari ini, program ini telah mengurangkan keuntungan syarikat telekomunikasi yang dikehendaki membentuk program ini.
39. PN-1252-L15039
Tuan Mohd. Khalid bin Ahmad minta **PERDANA MENTERI** menyatakan apakah usaha-usaha Kerajaan untuk mencegah peningkatan anak tak sah taraf yang semakin meningkat terutamanya di kalangan anak tak sah taraf beragama Islam.
40. PN-1252-L14886
Dato' Nalla K. S. minta **MENTERI DALAM NEGERI** menyatakan status terkini mengenai tindakan pihak Kerajaan ke atas penganjuran Bersih 3.0 di mana kesemua mereka ini telah mencalarkan maruah dan merosakkan nama negara sehingga memberi impak yang negatif kepada pelabur-pelabur luar.
41. PN-1252-L15077
Puan Hajah Rohani binti Abdullah minta **MENTERI KESIHATAN** menyatakan langkah-langkah Kementerian bagi menempatkan doktor pakar yang bertugas di luar bandar dan adakah Kementerian bercadang untuk mewajibkan doktor-doktor pakar ini berkhidmat sekurang-kurangnya bagi tempoh 1 tahun di luar bandar.
42. PN-1252-L14751
Datuk Chiw Tiang Chai minta **MENTERI PELAJARAN** menyatakan langkah-langkah ke arah merealisasikan pelan transformasi pendidikan dalam usaha meningkatkan kualiti pendidikan negara.

43. PN-1252-L15201
Puan Chew Lee Giok minta **PERDANA MENTERI** menyatakan keberkesanan Yayasan Bantuan Guaman Kebangsaan yang dilancarkan, setakat hari ini terdapat berapa orang awam yang meminta bantuan.
44. PN-1252-L14995
Dr. S. Ramakrishnan minta **MENTERI PELAJARAN** menyatakan:-
- (a) berapakah tempat yang ditawarkan kepada masyarakat India bagi mengikuti kursus di kolej matrikulasi untuk pengambilan sesi 2012 daripada 1500 tempat seperti yang diumumkan oleh YAB. Perdana Menteri; dan
 - (b) mengapa kuota 1500 tempat itu tidak diisi sepenuhnya dan apakah kriteria atau syarat kelayakan bagi mengikuti Program Matrikulasi.
45. PN-1252-L15218
Dato' Dr. Firdaus bin Haji Abdullah minta **PERDANA MENTERI** menyatakan faktor-faktor yang menghalang kelancaran pembinaan masjid di kawasan Brickfield yang rancangan pembinaannya telah diluluskan hampir dua tahun yang lalu, tetapi hingga saat ini pelaksanaannya masih kurang lancar.
46. PN-1252-L15193
Puan Chew Lee Giok minta **MENTERI PEMBANGUNAN WANITA, KELUARGA DAN MASYARAKAT** menyatakan apakah tindakan yang akan diambil untuk mengelakkan berlakunya kematian bayi di pusat asuhan atau asuhan peribadi di rumah.
47. PN-1252-L15320
Tuan Lihan Jok minta **MENTERI DALAM NEGERI** menyatakan sejauh manakah Kerajaan berjaya membasmi gejala status *stateless* di Sarawak dan apakah cabaran utama di dalam meluluskan permohonan untuk mendapat Sijil Kelahiran dan MyKad di Sarawak.
48. PN-1252-L14858
Dato' Jaspal Singh minta **MENTERI PELAJARAN** menyatakan garis panduan Biasiswa Kecil Kerajaan Persekutuan (BKP) bagi pelajar sekolah. Berapakah jumlah yang telah diperuntukkan di bawah BKP ini daripada tahun 2010 hingga 2012 dan bilangan pelajar yang telah menerima serta sama ada skim ini diberikan kepada semua jenis sekolah.
49. PN-1252-L15271
Datuk Haji Yunus bin Haji Kurus minta **MENTERI DALAM NEGERI** menyatakan isu keselamatan negara yang kian terancam ekoran daripada kejadian penyeludupan dadah dalam kuantiti yang besar oleh warga asing yang kerap kali berlaku di pintu-pintu masuk negara.

50. PN-1252-L15177
Dato' Boon Som a/l Inong minta **MENTERI KEMAJUAN LUAR BANDAR DAN WILAYAH** menyatakan sama ada rakyat Malaysia berketurunan Siam layak memohon dan mendapat pinjaman pendidikan dan perniagaan serta bantuan dan kemudahan lain yang disediakan oleh Majlis Amanah Rakyat (MARA).
51. PN-1252-L15078
Puan Hajah Rohani binti Abdullah minta **PERDANA MENTERI** menyatakan tindakan yang diambil oleh Kerajaan bagi membendung golongan ulama yang sering mengeluarkan fatwa-fatwa yang bertentangan dengan fatwa yang dikeluarkan oleh Majlis Fatwa Kebangsaan, contohnya bersabit dengan demonstrasi haram Bersih 3.0.
52. PN-1252-L15237
Datuk Hj Saat bin Hj Abu minta **MENTERI DALAM NEGERI** menyatakan untuk menyediakan dan membantu anggota polis di negeri Melaka terutama polis pelancongan dan menyediakan kios-kios untuk mereka kerana Melaka merupakan negeri pelancongan dan setiap tahun peratus pelancongan meningkat.
53. PN-1252-L15102
Tuan Subramaniam a/l Veruthasalam minta **MENTERI PERUMAHAN DAN KERAJAAN TEMPATAN** menyatakan apakah syarat-syarat kontrak Alam Flora untuk mengutip sampah, membersihkan longkang dan kawasan di Little India Brickfields, dan apakah langkah-langkah yang diambil untuk memantau jika Alam Flora memenuhi tanggungjawabnya seperti yang dinyatakan di kontrak.
54. PN-1252-L14778
Tuan Haji Ahamat @ Ahamad bin Yusop minta **MENTERI KEWANGAN** menyatakan :-
- adakah langkah terbaru MAS menawarkan Program Cuti Sukarela (VLP) sehingga tempoh maksimum 2 tahun mampu memulihkan MAS; dan
 - apakah jaminan pekerja yang menerima tawaran ini tidak hilang kekananannya serta bakal diserap kembali ke jabatan/unit asalnya.
55. PN-1252-L15265
Datuk Haji Yunus bin Haji Kurus minta **PERDANA MENTERI** menyatakan pelan serta perancangan Suruhanjaya Perkhidmatan Awam Darat (SPAD) bagi penambahaikan pengangkutan awam di Sabah, Sarawak dan Wilayah Persekutuan Labuan.

56. PN-1252-L15333

Puan Roslin binti Haji Abdul Rahman minta **MENTERI PENERANGAN, KOMUNIKASI DAN KEBUDAYAAN** menyatakan:-

- (a) adakah perancangan dibuat untuk Geran Industri Kreatif dimanfaatkan bagi mendokumentasikan hasil kreativiti setempat (*local creativity*), seumpamanya mendokumentasikan kaedah penyediaan masakan tempatan, mendokumentasikan seni bina rumah tradisional, mendokumentasikan kraf tangan seperti batik, mendokumentasikan seni muzik tradisional; dan
- (b) jika ada, berapa banyak kerajaan telah mengeluarkan wang geran untuk tujuan ini, apakah "mode pendokumentasian" yang digunakan (tulisan atau video atau audio) dan apakah kayu-ukur pemberian Geran ini

57. PN-1252-L14976

Dato' Dr. Johari bin Mat minta **MENTERI DALAM NEGERI** menyatakan sehingga kini berapakah kes kematian di dalam tahanan dan apakah langkah-langkah yang telah diambil untuk mengelakkan perkara tersebut berlaku pada masa hadapan supaya pandangan buruk terhadap polis dapat dihapuskan. Ini adalah berikutan laporan-laporan akhbar bahawa terdapat tahanan yang mati dalam tahanan polis khasnya ketika siasatan terhadap kes-kes jenayah.

58. PN-1252-L15162

Puan S. Bagiam a/p Ayem Perumal minta **MENTERI KESIHATAN** menyatakan apakah langkah-langkah yang diambil oleh Kementerian dalam mewujudkan kesedaran tentang masalah obesiti yang kian meningkat serta apakah Kementerian sudah mempunyai alternatif dalam menangani masalah ini.

59. PN-1252-L15031

Tuan Pau Chiong Ung minta **MENTERI DALAM NEGERI** menyatakan:-

- (a) apakah tindakan yang telah pun diambil oleh Kementerian memandangkan kes bunuh diri pemuda-pemudi semakin bertambah sejak kebelakangan ini; dan
- (b) apakah statistik kes bunuh diri pemuda-pemudi mengikut negeri dalam tiga tahun kebelakangan ini dan sebab mereka melakukan tindakan sedemikian.

60. PN-1252-L14885

Puan Hajah Noriah binti Mahat minta **MENTERI PELAJARAN** menyatakan keberkesanan dan kejayaan program LINUS (Program Literasi dan Numerasi) yang dilaksanakan sejak tahun 2010 dan adakah ia akan dilanjutkan selepas tamat tempoh pelaksanaan tahun ini.

61. PN-1252-L15292

Datuk Maijol bin Mahap minta **MENTERI LUAR NEGERI** menyatakan apakah status terkini mengenai desakan Malaysia kepada Kerajaan Filipina supaya menubuhkan pejabat konsulatnya di Sabah.

62. PN-1252-L14922

Tuan Lee Cheam Choon minta **MENTERI DALAM NEGERI** menyatakan demonstrasi jalanan yang diadakan oleh BERSIH bermotif untuk membersihkan sistem serta cara pilihan raya yang kononnya dianggap tidak adil. Akan tetapi sistem pilihan raya tersebut telah melahirkan pemimpin negara yang menerajui pentadbiran negara selama ini. Adakah pihak Kerajaan akan bertindak mengharamkan demonstrasi sebegitu atau sebaliknya.

63. PN-1252-L14947

Tuan Khoo Soo Seang minta **MENTERI TENAGA, TEKNOLOGI HIJAU DAN AIR** menyatakan langkah-langkah yang diambil untuk menyelaraskan pengurusan Tenaga Nasional Berhad (TNB) supaya menjadi lebih efisien dan tidak perlu bergantung kepada subsidi gas daripada Petronas. Adakah sumber-sumber tenaga yang lain, contohnya daripada gas *methane* tapak pelupusan sampah, pernah diceburi.

64. PN-1252-L14942

Tuan Lee Cheam Choon minta **MENTERI PELAJARAN** menyatakan sekolah swasta beraliran Cina di negara ini telah banyak melahirkan individu atau profesional yang berpotensi tinggi dan disegani. Ini menunjukkan sistem pendidikan yang diamalkan oleh sekolah berkenaan berkualiti. Adakah pihak Kementerian akan mempertimbangkan untuk mengiktiraf sijil akademik daripada sekolah berkenaan.

65. PN-1252-L14970

Dato' Dr. Johari bin Mat minta **MENTERI PERTANIAN DAN INDUSTRI ASAS TANI** menyatakan adakah benar nelayan tempatan menyewa lesen nelayan laut dalam kepada nelayan asing serta jumlah tangkapan dan dakwaan terhadap pencerobohan oleh nelayan asing ke perairan negara kita.

66. PN-1252-L15079

Puan Hajah Rohani binti Abdullah minta **MENTERI PELANCONGAN** menyatakan bilangan pelancong antarabangsa yang telah datang ke Malaysia bagi tahun 2011 dan 2012 terkini dan nyatakan langkah-langkah Kementerian bagi memastikan Malaysia terus muncul sebagai destinasi utama pelancong dunia.

67. PN-1252-L15150

Datuk Kadzim M. Yahya minta **PERDANA MENTERI** menyatakan mengapa Kementerian tidak menguatkuasakan penggunaan meter ke atas teksi-teksi di bandar utama negeri Sabah. Teksi-teksi di bandar-bandar utama masih tidak menggunakan meter walaupun terdapat meter di dalam teksi tetapi sering menggunakan tambang teksi dengan kadar mata wang Dollar Amerika kepada pelancong yang mana memberi gambaran negatif kepada para pelancong luar negara.

68. PN-1252-L14745

Datuk Chiw Tiang Chai minta **MENTERI DALAM NEGERI** menyatakan sama ada Kementerian mempunyai perancangan khusus memantau kebanjiran warga Afrika yang terlibat dalam pemalsuan wang, dadah, penipuan siber serta pelbagai lagi gejala liar yang mengganggu ketenteraman awam serta ancaman kepada negara.

69. PN-1252-L15055

Puan Hajah Mariany binti Mohammad Yit minta **MENTERI KERJA RAYA** menyatakan dasar baru di mana Pemberhentian Pendaftaran Kontraktor dengan Pusat Khidmat Kontraktor (PKK) dan menjadikan CIDB sebagai agensi tunggal yang menguruskan pendaftaran dan pelesenan kontraktor selepas 15 September 2012 dan apakah dengan dasar ini, nasib kontraktor Bumiputera akan terus menikmati keistimewaan sebagaimana kontrak-kontrak Kerajaan yang ditawarkan semasa PKK menjadi agensi pendaftaran kontraktor.

70. PN-1252-L15008

Dato' Haji Abdul Rahman bin Bakar minta **MENTERI DALAM NEGERI** menyatakan sejauh mana pelaksanaan Majlis Media yang dicadangkan oleh Kerajaan. Apakah Majlis Media ini ditubuhkan setelah pemansuhan Akta Mesin Cetak dan Penerbitan dibuat (laksanakan) tidak lama dulu sedangkan Majlis Media begitu lama dirancang berpuluhan tahun lalu.

71. PN-1252-L14983

Dr. S. Ramakrishnan minta **PERDANA MENTERI** menyatakan statistik mengikut kaum graduan yang mengikuti program Skim Latihan 1Malaysia (SL1M) sejak ia dilancarkan oleh YAB. Perdana Menteri pada 1 Jun 2011 dan nyatakan juga statistik graduan yang ditawarkan pekerjaan mengikut kaum selepas mengikuti program SL1M ini.

72. PN-1252-L14820

Dato' Syed Ibrahim bin Kader minta **MENTERI PEMBANGUNAN WANITA, KELUARGA DAN MASYARAKAT** menyatakan Kerajaan ada mewujudkan tasha dan pusat asuhan kanak-kanak di pejabat-pejabat Kerajaan bagi memudahkan kakitangan awam menghantar anak mereka ke situ. Berapakah jumlah pusat-pusat asuhan yang beroperasi di jabatan Kerajaan dan sejauh mana kemudahan yang diberi ini digunakan oleh kakitangan awam.

73. PN-1252-L15303

Datuk Raja Ropiaah binti Raja Abdullah minta **MENTERI LUAR NEGERI** menyatakan apakah Kerajaan Persekutuan mempunyai hasrat untuk mengaktifkan kembali projek jambatan antara Johor dan Singapura (Jambatan Bengkok) yang telah dibatalkan sebelum ini serta adakah Kerajaan mempunyai pelan alternatif yang lain untuk jambatan ini.

74. PN-1252-L15020

Dato' Haji Abdul Rahman bin Bakar minta **MENTERI KERJA RAYA** menyatakan:-

- (a) jumlah keuntungan sebenar semua syarikat konsesi tol lebuh raya di Malaysia sejak 2000 hingga kini; dan
- (b) jumlah pampasan yang dibayar oleh Kerajaan kepada syarikat konsesi lebuh raya ekoran penutupan beberapa tol dan apakah Kerajaan bercadang untuk menghapuskan bayaran tol di sesebuah negara dan bila.

75. PN-1252-L14756
Tuan Haji Abdul Shukor bin Mohd Sultan minta **PERDANA MENTERI** menyatakan kedudukan terkini pencapaian NCER bagi negeri Perlis dari segi penanaman padi.
76. PN-1252-L14864
Dato' Jaspal Singh minta **MENTERI PERUMAHAN DAN KERAJAAN TEMPATAN** menyatakan jumlah bilangan krematorium lama dan moden di seluruh Semenanjung Malaysia dan berapakah antaranya di bawah kawalan Kerajaan dan swasta. Berapakah jumlah peruntukan yang telah disediakan oleh Kerajaan pusat bagi mengurus dan mengekalkan krematorium.
77. PN-1252-L14808
Dato' Syed Ibrahim bin Kader minta **PERDANA MENTERI** menyatakan Majlis Fatwa Kebangsaan yang bersidang pada 23 Mac 1995 telah memutuskan bahawa hukum merokok di sisi Islam adalah haram. Akan tetapi bilangan perokok di kalangan umat Islam tidak berkurangan malah semakin bertambah. Apakah tindakan yang diambil oleh Kerajaan dalam menyampaikan mesej Majlis Fatwa Kebangsaan kepada umat Islam di negara ini.
78. PN-1252-L14784
Tuan Haji Ahamat @ Ahamad bin Yusop minta **MENTERI BELIA DAN SUKAN** menyatakan pandangan Kementerian berkaitan dengan kegairahan golongan belia yang menyertai parti politik yang gemar menggunakan platform 'debat' dalam mengutarakan hujah dan pandangan masing-masing.
79. PN-1252-L14913
Tuan Baharudin bin Abu Bakar minta **MENTERI PERDAGANGAN ANTARABANGSA DAN INDUSTRI** menyatakan langkah-langkah proaktif SME Corporation Malaysia (SME Corp.) untuk melonjakkan IKS luar bandar supaya lebih berperanan dalam membentuk ekonomi berpendapatan tinggi.
80. PN-1252-L14768
Tuan Haji Abdul Shukor bin Mohd Sultan minta **PERDANA MENTERI** menyatakan adakah Kementerian bercadang menggunakan kaedah khidmat mediator dalam usaha membantu menyelesaikan beberapa isu pertikaian awam termasuk isu Lynas dan masalah bekalan air di Lembah Klang.
81. PN-1252-L15247
Datuk Paul Kong Sing Chu minta **MENTERI PELAJARAN** menyatakan jumlah keseluruhan guru dan sekolah di negara ini, termasuk jumlah pelajar di sekolah rendah dan menengah.

82. PN-1252-L15346

Tuan Saiful Izham bin Ramli minta **MENTERI TENAGA, TEKNOLOGI HIJAU DAN AIR** menyatakan mengapa Penjana-penjana Tenaga Bebas atau IPP dikecualikan daripada menanggung beban kos pembelian bahan bakar alternatif seperti distillate, diesel dan sebagainya termasuk kos membeli bekalan elektrik daripada negara jiran Thailand sebanyak kira-kira RM3 bilion pada tahun 2011 akibatnya dari krisis dan kekangan bekalan gas oleh PETRONAS kepada sektor tenaga pada tahun tersebut, dan hanya membiarkan ianya ditanggung secara bersama oleh Kerajaan, PETRONAS dan TNB seperti mana laporan akhbar-akhbar utama negara ketika itu.

83. PN-1252-L14859

Tuan Chiew Lian Keng minta **MENTERI PENERANGAN, KOMUNIKASI DAN KEBUDAYAAN** menyatakan sama ada alat pemancar gergasi yang dihiasi sebagai kotak iklan kepunyaan pihak Syarikat YES di bahu jalan persimpangan Jalan Bukit Bintang dan Jalan Sultan Ismail itu selamat dan mematuhi syarat-syarat keselamatan *radioactive* dan *microwave* kerana para pengunjung dan pejalan kaki yang begitu banyak berulang-alik di kawasan tersebut.

84. PN-1252-L15097

Tuan Subramaniam a/l Veruthasalam minta **PERDANA MENTERI** menyatakan jika ada apa-apa rancangan untuk menstruktur semula sistem permit teksi agar memberi permit tersebut secara langsung kepada pemandu-pemandu teksi dan bukan kepada syarikat dan koperasi yang mengaut keuntungan berlebihan daripada pemandu-pemandu teksi dan rakyat.

85. PN-1252-L15283

Datuk Raja Ropiaah binti Raja Abdullah minta **MENTERI DALAM NEGERI** menyatakan kos yang terpaksa ditanggung Kerajaan serta kerugian kepada peniaga-peniaga atas tindakan (BERSIH) dan sejauh mana imej, kestabilan dan keselamatan negara terjejas dengan perlakuan penganjur yang tidak bertanggungjawab. Kenapakah Kerajaan tidak mengambil langkah yang lebih tegas untuk mengelak berlakunya perkara yang menyusahkan rakyat.

86. PN-1252-L15314

Puan Hajah Dayang Madinah binti Tun Abang Haji Openg minta **MENTERI PELAJARAN** menyatakan sama ada pihak Kementerian mempunyai perancangan bagi menyediakan sekolah vokasional di Sarawak khusus untuk golongan OKU (contohnya mereka yang pekak) yang boleh mampu membuat kerja tangan, agar mereka berpeluang untuk berdikari mencari pendapatan.

87. PN-1252-L14796

Datuk Chin Su Phin minta **MENTERI DALAM NEGERI** menyatakan berapakah kes kecurian dan penyeludupan kereta yang telah direkodkan dari tahun 2005 hingga sekarang dan apakah tindakan tegas yang diambil oleh Kementerian.

ATURAN URUSAN MESYUARAT DAN USUL-USUL

1. (D.R. 27/2012) Rang Undang-undang Perbekalan Tambahan (2012) 2012
– **Menyambung semula Perbahasan atas masalah, “Bawaha Rang Undang-undang ini dibacakan kali yang kedua sekarang” (10 Julai, 2012)**

[Menteri Kewangan]
2. (D.R. 25/2012) Rang Undang-undang Pelindung (Pindaan) 2012 **Bacaan Kali Yang Kedua**

[Menteri Perdagangan Antarabangsa dan Industri]
3. (D.R. 24/2012) Rang Undang-undang Perubatan (Pindaan) 2012 “

[Menteri Kesihatan]
4. (D.R. 19/2012) Rang Undang-undang Kualiti Alam Sekeliling (Pindaan) 2012 “

[Menteri Sumber Asli dan Alam Sekitar]
5. (D.R. 26/2012) Rang Undang-undang Umur Persaraan Minimum 2012 “

[Menteri Sumber Manusia]
6. (D.R. 29/2012) Rang Undang-undang Pengangkutan Jalan (Pindaan) 2012 “

[Menteri Pengangkutan]
7. (D.R. 28/2012) Rang Undang-undang Francais (Pindaan) 2012 “

[Menteri Perdagangan Dalam Negeri, Koperasi dan Kepenggunaan]
8. PN-1252-U15026
Dato' Haji Abdul Rahman bin Bakar akan mencadangkan:-

“Bawaha Dewan ini mendesak Kerajaan supaya mengambil pendekatan yang sesuai agar ajaran anutan Syiah tidak menular dan merebak di kalangan orang-orang Islam di negara kita kerana ada fakta menyebut terdapat 200 juta pengikut Syiah di seluruh dunia. Di negara kita, anutan Syiah sedang berkembang.

Tanpa mengambil suatu tindakan yang cekap dan berkesan oleh pihak Jabatan Perdana Menteri melalui JAKIM, penyebaran ajaran ini akan menyebabkan umat Islam negara kita yang mengamalkan ajaran Sunnah Waljamaah akan terpesong. Justeru, apakah usaha yang dilakukan JAKIM memadai selama ini dari segi penguatkuasaannya. Jika ya, nyatakan usaha berkenaan. Jika tidak, apakah Kerajaan merasakan perkara ini di dalam pemantuan dan tidak memudararatkan ummah Islam di Malaysia."

[Menteri di Jabatan Perdana Menteri]

9. PN-1252-U15027

Dato' Haji Abdul Rahman bin Bakar akan mencadangkan:-

"Bahawa Dewan ini menyarankan agar Kerajaan melaksanakan BR1M II seeloknya pada sebelum tahun baharu 2013 sebagai persiapan kepada persekolahan anak-anak dan sambutan tahun baru. Ini adalah usaha mapan Kerajaan ke arah membela nasib golongan yang berpendapatan kurang daripada RM3000 sebulan. Sesungguhnya, BR1M I telah memberi imbuhan langsung kepada masyarakat berpendapatan rendah dan rata-rata rakyat cukup berterima kasih kepada Kerajaan. Melihat kepada kesan daripada BR1M I, jika sesuai dan mempunyai kedudukan kewangan yang kukuh, adalah wajar BR1M II diberikan pada tahun ini atau awal tahun depan. Setelah BR1M I dilaksanakan, apakah tidak ada kesan kepada ekonomi negara sedangkan seluruh dunia sedang menghadapi kemelesetan ekonomi terutamanya di Amerika Syarikat dan beberapa Negara EU."

[Menteri Kewangan]

10. PN-1252-U15028

Dato' Haji Abdul Rahman bin Bakar akan mencadangkan:-

"Bahawa Dewan ini mendesak pihak-pihak berwajib supaya meneliti dan mengambil tindakan sewajarnya ke atas kebanjiran pelarian dari Myanmar yang mungkin lama kelamaan akan menyekat hak rakyat yang sah dan menjelaskan hubungan baik antara Negara. Bukan suatu rahsia lagi bahawa ramai orang-orang Islam yang terbunuh dan menjadi pelarian di Myanmar akibat pemerintahan junta sejak berpuluhan tahun lalu. Tidak kurang 1,500 orang Islam telah berhijrah ke negara-negara jiran termasuk Malaysia. Mereka hidup merempat dan tidak sempurna dan ada yang menjadi peminta sedekah demi untuk sesuap nasi. Ada juga yang bekerja dengan syarikat-syarikat swasta mengikut minat dan kemahiran masing-masing. Persoalannya, apakah tindakan pihak Kerajaan terhadap masalah ini kerana jika tidak dibendung akibatnya lama-kelamaan kita terpaksa pula melayan mereka sebagai warga negara kerana ada di kalangan mereka yang berkahwin dengan penduduk setempat. Selain itu, kita juga terpaksa bertimbang rasa terhadap anak-anak mereka yang dahagakan pelajaran. Kita terpaksa memberi ruang yang adil kepada anak-anak mereka kerana aspek pelajaran, kesihatan, agama dan perlindungan adalah sesuatu yang universal.

Justeru, saya memohon pihak-pihak berwajib supaya meneliti dan mengambil tindakan sewajarnya agar ianya tidak menjelaskan hubungan baik antara negara dan di masa sama tidak menjelaskan peluang rakyat tempatan yang sah dan yang hak."

[Menteri di Jabatan Perdana Menteri]

11. PN-1252-U15004

Dr. S. Ramakrishnan akan mencadangkan:-

"Bahawa Dewan ini mendesak agar pihak Kerajaan menggubal Undang-undang Kebebasan Maklumat bagi membolehkan rakyat Malaysia menikmati hak untuk mendapatkan maklumat selaras dengan kehendak prinsip-prinsip demokrasi. Hak rakyat untuk mendapatkan maklumat adalah penting bagi membolehkan rakyat untuk memeriksa dan membendung penyalahgunaan kuasa oleh kakitangan Kerajaan dalam hal-hal pentadbiran Kerajaan terutamanya keputusan-keputusan Kerajaan yang mempunyai implikasi secara langsung dan tidak langsung terhadap rakyat jelata. Oleh itu saya mengambil kesempatan melalui mesyuarat Dewan Negara ini untuk menampilkkan usul penggubalan undang-undang bagi tujuan membolehkan rakyat Malaysia untuk mengambil bahagian dalam pentadbiran dan hal-hal Kerajaan terutamanya dalam proses membuat keputusan-keputusan sejajar dengan prinsip demokrasi (*participatory democracy*) dan kepentingan awam (*public interest*). Rakyat Malaysia mengalu-alukan satu Kerajaan yang telus dan bertanggung jawab maka penggubalan undang-undang ini adalah mustahak. Undang-undang ini akan memberikan akses kepada dokumen-dokumen sesebuah agensi Kerajaan dan dokumen-dokumen rasmi Kementerian Kerajaan. Maka disarankan supaya Kerajaan mengambil serius penggubalan undang-undang ini dan mengambil segala langkah-langkah untuk merealisasikan undang-undang ini di Malaysia yang mana undang-undang begini telah pun di perkenalkan di negara-negara Komanwel yang lain.

[Menteri di Jabatan Perdana Menteri]

12. PN-1252-U15005

Dr. S. Ramakrishnan akan mencadangkan:-

"Bahawa Dewan ini mendesak agar pihak Kerajaan prihatin dan memandang serius terhadap penyalahgunaan minuman alkohol dan minuman keras di kalangan masyarakat kita, terutama di kalangan remaja bermula dari usia 16 tahun yang amat dibimbangi ia akan membawa padah kepada masa depan negara jika kita tidak mengambil tindakan yang sewajarnya secepat mungkin. Oleh itu, saya mengambil kesempatan melalui mesyuarat Dewan Negara ini untuk menampilkkan usul penggubalan undang-undang untuk menangani penyalahgunaan alkohol dan minuman keras di kalangan masyarakat kita dengan mengambil langkah-langkah berikut:-

- (i) Mengubah dan meningkatkan umur seseorang untuk membeli minuman keras dan alkohol secara sah dari segi undang-undang dari 18 tahun ke 21 tahun. Hukuman berat dan denda yang maksimum juga harus dikenakan terhadap sesiapa sahaja yang di bawah umur 21 tahun jika mereka didapati membeli minuman alkohol dan minuman keras.
- (ii) Memperkenalkan sistem lesen baru yang mengawal waktu penjualan alkohol dan minuman keras. Contohnya seperti mengehadkan waktu penjualan dari 11.00 pagi sehingga pukul 9.00 malam.
- (iii) Mempunyai undang-undang untuk menangani masalah-masalah pengambilan minuman-minuman keras dan alkohol di tempat awam dan menjadikan pengambilan minuman ini di tempat awam sebagai satu jenayah di mana boleh ditangkap dan didakwa di bawah kanun undang-undang.
- (iv) Memperketatkan lagi kanun undang-undang yang mengawal penjualan alkohol dan minuman keras oleh peniaga-peniaga kepada remaja dan juga pelajar-pelajar di bawah umur. Contohnya, apabila mana-mana peniaga menjual alkohol dan minuman keras kepada pelajar-pelajar dan remaja di bawah umur, lesen kedai peniaga itu haruslah ditarik dan dibatalkan dan mengenakan denda yang maksimum terhadap peniaga tersebut.
- (v) Memperkenalkan undang-undang baru untuk pendaftaran dan mengawal penjualan minuman-minuman keras buatan tempatan. Contohnya seperti samsu dan ia mendapat sambutan baik di kalangan masyarakat berpendapatan rendah, terutamanya di kalangan masyarakat India yang tinggal di estet, kerana harga minuman ini adalah sangat murah dan mudah didapati di kawasan pedalaman secara haram.
- (vi) Menubuhkan satu pusat pencegahan, penyelidikan, dan pemulihan alkohol Malaysia seperti di Amerika Syarikat dan Australia untuk mengadakan penyelidikan dari semasa ke semasa."

[Menteri Perumahan dan Kerajaan Tempatan]

UCAPAN PENANGGUHAN

BIL.	TARIKH UCAPAN	AHLI YANG BERUCAP	TAJUK UCAPAN	MENTERI YANG BERTANGGUNGJAWAB
1.	11.7.2012 (Rabu)	Sen. Puan Hajah Khairiah binti Mohamed	Pendaftaran Sijil Kelahiran Anak Tak Sah Taraf	Menteri Dalam Negeri